

13 July. 2026

समे .18:15 Hrs

<><><><><>

Headlines

- अलगाववादिएं दा बखान करने आहली कताबें दे त्रै प्रकाशकें गी पुलस हिरासत च भेजेआ गेआ।
- जम्मू-कश्मीर च मेडिकल शिक्षा गी बढ़ावा देने दी इक गैड तैहत एन.एम.सी नै जीएमसी जम्मू लेई 50 बाददू एम.बी.बी.एस सीटें गी मंजूरी दिती।
- माली बरें 2025-26 च बेहतर कारकदर्गी दस्सदे होई उधमपुर जिले नै नसबंदी सरबन्धी सेवाएं च पैहली थाहर हासिल कीती। पुंछ नै दुई ते रियासी जिले नै त्री थाहर हासिल कीती।
- डी.जी.सी.आई.एस.एफ होरें बालटाल आधार शिविर ते श्री अमरनाथ जी दी पविता गुफा दा दौरा लाइये सुरक्षा इंतजामें दा जायजा लैता।
- रामवन जिले दी चंद्रकोट थाहर होए दे शिड़क हादसे च 18 अमरनाथ श्रद्धालु घायल होई गए न।

<><><><><>

Police Remand

अदालतै त्रै प्रकाशकें गी कथित तौर पर अलगाववादी नेताएं दा महिमामंडन बरवान करने आहली कताबें दे प्रकाशन ते उंदी बंड सरबन्धी मामले च पुच्छ-पड़ताल लेई 10 दिन दी पुलस रिमांड च भेजी दित्ता ऐ। जम्मू च काउंटर इंटेलीजेंस यूनिट नै सरकारी लाइब्रेरीज़ गी उपलब्ध करोआई गेदी किश कताबें च कथित तौर पर अलगाववादिएं दे महिमामंडन आहली सामग्री थोने कन्नै जुडे दे विवाद दी जांच तैहत ऐतवारें त्रै प्रकाशकें गी गिरफ्तार कीता ह। गिरफ्तार प्रकाशकें ओबराय बुक सर्विस दे इंद्रपाल ते नोएडा स्थित डामीनेट पब्लीशर्स दे अमरदीप सिंह ते गिरीश अरोड़ा गी वर्चुअल माध्यम राएं अदालत च पेश कीता गेआ जेदे मगरा अगो दी जांच लेई उनेंगी पुलस रिमांड लेई भेजी दित्ता गेआ। इस बारै होर मती जानकारी सहाडे जिला संवाददाता थमां

<><><><><>

NMC-Med. Seats

मेडिकल शिक्षा आहले सैक्टर ते डाक्टर बनने दा सुखना दिक्खने आहले नौजवानें लेई इक महत्वपूर्ण पैहलकदमी तैहत बाददू मेडिकल सीटें लेई मंजूरी दिती ऐ। नेशनल मेडिकल कमिशन नै इस बारै मंजूरी दिती ते एहदी घोशणा मेडिकल शिक्षा मैहकमे आसेआ कीती गेई। एन.एम.सी नै बाददू 50 एम.बी.बी.एस सीटें लेई मंजूरी दिती।

<><><><><><>

Sterilisation Services

जम्मू-कश्मीर च उधमपुर जिला माली बरें 2025-26 च नसबंदी सेवाएं दे मामलें च पैहली थाहर पर रेहा ऐ, जिसलै के जिला पुंछ दुई थाहर पर ते रियासी त्रीए नंबर पर ऐ। एहू घोशणा परोआर कल्याण मैहकमे दियां डरैक्टर डा. अफसाना बानो हुंदी अध्यक्षता च जम्मू दे नगरोंटा च विश्व जनसंख्या दिवस अभियान 2026 दी पछोकड़ै च लग्गी दी इक जायजा बैठक दरान कीती गेई। इस दरान बेहतरीन प्रदर्शन करने आहले जिलें गी उंदे कम्में लेई सराहना प्रमाण पत्र ते समृति चिन्ह देइयै सम्मानित कीता गेआ। इस बारै होर जानकारी दिंदे होई चीफ मेडिकल अफसर पुंछ डा. परवेज खान होरें आखेआ

<><><><><><>

UPI-Transactions

उधमपुर दे बजारें च नकदी दी थाहर हून कामयाब यूपीआई लैन-देन नै रफतार फगड़ी ऐ। फही भाएं ओहू कोई बड्डी दकान होऐ जां फही रेहड़ी-फड़ी लाने आले जिआं जे सब्जी ते फल फ्रूट बेचने आले, गन्ने दा रस जां कुल्फी बगैरा बेचने आले। सबनें थाहरें पर क्यू.आर कोड राहें डिजिटल पेमेंट आली बवस्था गै दिक्खने गी लब्बा'रदी ऐ। गाहक हून छड़ा मोबाइल फोन कन्नै गै मिंटें च भुगतान करदे ना। लौहके बपारियें दा आखना ऐ जे डिजिटल भुगतान कन्नै कारोबार सोक्खा होई गेआ ऐ। इस तब्दीली दा सोआगत करदे होई गाहक बिट्टू सिंह होरें आखेआ

जिसलै के सब्जी बेचने आले हंसराज ठाकुर हुं'दा आखना हा

<><><><><><>

ते हुन बाकि दिएं खबरें कन्नै श्रुति खजूरिया।

DG-CISF

डरैटर जनरल सी.आई.एस.एफ प्रवीन रंजन होरें होर दुए वरिष्ठ अफसरें कन्नै बालटाल आधार शिविर ते श्री अमरनाथ जी दी पवित्तर गुफा दा दौरा लाया ते चला'रदी श्री अमरनाथ जी दी जात्तरा दे सुरक्षा इंतजामें दा जायजा लैता। इस दरान सुरक्षा सरबंधी हीले, मेडिकल प्रतिक्रिया दल, अगग लग्गने दी सूरत च बचाऽ सरबंधी तैयारियां ते होर दुए इंतजामें दा जायजा लैता। दौरे दरान डी.जी होरें केंद्री सशस्त्र पुलस बल, भारती सेना, जम्मू-कश्मीर पुलस दे वरिष्ठ अधिकारिएं ते होर दुई सरबंधी एजेंसिएं दे अफसरें कन्नै बैठक लाई। उनें सांझे पुलस नियंत्रण कक्ष ते नमें कायम सी.आई.एस.एफ कैप दा बी जायजा लैता।

<><><><><><>

Accident-Ramban

रामबन जिले दे चंद्रकोट इलाके च इक लंगर आहली थाहर 6 जे.के.आर.टी.सी दियां बसां, इक लौहकी गड्डी ते इक निजी बस आपू चै टकराई गेइयां जेदे चलदे 18 अमरनाथ श्रद्धालु घायल होई गए। सारे घायलें दी हालत स्थिर दस्सी जा'रदी ऐ। जे.के.एस.आर.टी.सी दियां बसां जेड़ियां जात्तरा कानवाई दा हिस्सा हिआं आपूं'चै टकराई गेइयां। टक्कर मगरा इक बस लौहकी गड्डी कन्नै बज्जी जेड़ी निजी बस कन्नै टकराई गेई। इस बारै होर मती जानकारी दिंदे होई रामबन दे डिप्टी कमिशनर मोहम्मद अलयास खान होरें आखेआ

<><><><><><>

Lepoard-Fear

उधमपुर दे रिट्टी गांस च इक मादा तेंदुए ते ओहदे 2 बच्चें गी घरें दे नेड़े केई बारी दिक्खे जाने करी लोग परेशान ना। मकामी लोकें दा आखना ऐ जे इनें जनौरें गी पिछले केई दिनें दरान घरें दे कोल इक मकामी डेयरी ते लसल खड्ड दे आले-दोआले दिक्खेआ गेआ। उंदा आखना ऐ जे तेंदुए नै पालतू कुत्ते दे कन्नोकन्नी भिड्डें ते बकरियें पर बी हमला कीता, जेदे कन्नै उंदी सुरक्षा गी लेइयै चैंता बधी गेई ऐ। तोआई, वन्य जीव मैहकमे नै इलाके च कंट्रोल रूम दी इक टीम भेजी दिती ऐ ते तेंदुए ते ओहदे शावकें दा पता लाने लेई नियमित गश्त कीती जा'रदी ऐ। आकाशवाणी समाचार कन्नै गल्ल करदे होई रिट्टी पंचैत दे साबका सरपंच गिरधारी लाल पादृदा होरें आखेआ वन्यजीव मैहकमा कंट्रोल रूम दे इंचार्ज जोगिंद्र पाल होरें आखेआ

<><><><><><>

Adv. Announcement

आकाशवाणी जम्मू दे प्रादेशिक समाचार एकांश ने प्हाड़ी भाशा लेई कैजुअल न्यूजरीडर-कम-ट्रांसलेटर ते स्टेनोग्राफर दे पैनल च शामिल होने लेई जम्मू-कश्मीर दे रौहने आहले 21 शा 50 ब'रें धोड़ी दी उम्री दे इच्छुक मेदवारें कोला दरखवास्तां मंगियां ना।

कैजुअल न्यूजरीडर-कम-ट्रांसलेटर लेई घट्टोघट्ट योग्यता कुसै मान्यता हासल यूनिवर्सिटी थमां ग्रेजुएशन ते प्हाड़ी भाशा दी शैल जानकारी दा होना ऐ। न्यूजरीडर लेई (प्रसारण लेई मुआफक) खरी अवाज दा बी होना जरूरी ऐ।

स्टेनोग्राफर लेई, घट्टोघट्ट योग्यता कुसै मान्यता हासल एजुकेशन बोर्ड थमां 12मीं पास होना ते प्हाड़ी भाशा च खरी जानकारी दा होना ऐ। कन्नै गै, कम्प्यूटर पर प्हाड़ी भाशा च टाइपिंग दी स्पीड 25 कोला 40 लफ़्ज़ फी मिंट होनी लोडचदी ऐ।

आवेदन दी हार्ड कॉपी 'हेड ऑफ न्यूज, रीजनल न्यूज यूनिट, आकाशवाणी, पंजतीर्थी जम्मू पिनकोड-180001' दे दफ्तरै च (दस्ती) जमा करोआनी होग। एहदे कन्नै सब्बै जरूरी दस्तावेज ते आवेदन शुल्क बी होना चाहिदा

(जेहड़ा वापस नेई होग)। सामान्य श्रेणी दे मेदवारें लेई एह शुल्क 355 रपे ते एस.सी/एस.टी/ओ.बी.सी मेदवारें लेई 265 रपे (18 फीसद जी.एस.टी सने) ऐ।

एह शुल्क प्रसार भारती, आकाशवाणी, जम्मू दे बैंक खाता नंबर 10582387126(एस.बी.आई मेन ब्रांच, हरि मार्केट, जम्मू) च ऑनलाइन जमा कीता जाई सकदा ऐ। आई.एफ.एस.सी कोड: SBIN0000657 ऐ। शुल्क जमा करने दे बाद मिले दे स्क्रीनशॉट दा प्रिंटआउट जां ऑनलाइन पेमेंट/ट्रांजैक्शन आई.डी, आवेदन दे कन्नै जरूर होनी लोड़चदी। आवेदन करने दी खीरी तरीक 19 जुलाई 2026 (ऐतवार) ऐ। मती जानकारी टेलीफोन नंबर 0191-2546658 ते 9697177241 पर लैती जाई सकदी ऐ। तफ्सीली इश्तेहार ते आवेदन फॉर्म साढ़ी वेबसाइट www.newsonair.gov.in पर होमपेज दे अखीरै च 'Vacancies' आइकन पर उपलब्ध ऐ।

<><><><><><>